



Dara Sawîrên Tî



Hoşeng Osê

Helbest

Dara Sawîrên Tî _ Helbest
Hoşeng Osê.

Çapa yekemîn _ şam Gulana /2006

Wêneya qabê ya hinermendê şêwekarî Guro ye .

Amadekirina qabê Ebdirrehman Osman.

Hemû mafên çap û belevkirinê ji nivîskar re ne .

Diyarî

Ji bo hemû kesên ku hîna ez wan nas nakim.

Ji bo hinek kesên ku ez wan nas dikim.

*Ji bo giyanê hinermend **SERHED** û dengê hinermend **ŞEYDA***

Di gel hinek xem û xewnên din

Hoşeng

Şivanê Xewnan

Şiva xwe li piştê şevê xe

*û keriyên xwe berde zozanên ku ji nalîna bilûra te rijiyane
li ser sînga helbesta "Xanî".*

Bera têr biçêrin.

Li ser tayê berbangê

refên sitêrkan razayîne.

*Wan şiyar neke. Her sitêrkek, di himbêza xwe de
Pakrewankî dilorîne.*

* * *

çemê ji tiliyên te der hatiye

pêlên wî ko bûne.

Ew ên çawa karibin çola bêdengiyê biqelêşin

û xaçerêyekê li nav striyan

ji karwanên sozdarên re bikolin?!

De pencera dilê xwe ji pertavên bîranînan re veke

û destên xwe li qeyika helbestê xe.

Bera li nav ayetên bejna Rozerîn a min û te avjeniyê bike.

Ew bejna tijî girav û bendav

tijî kendav û tengav, gerdûneke dine.

Tê li wê derê, hînî elfebêya xwendina razên wê bibî.

Tê nasbikî bê Xwedê çendîn hinermende

û her hinermendek Xwedayeke.

* * *

Şivano...

Dîrok...

dewran...

zemîn pîr dibin.

Tenê xewnên te ciwan dimînin.

Gelo, ciwaniya xwe ji kîjan kaniyê vedixwin?!.

Dem û xwerist ker dibin

lal dibin.

Tenê xewnên te stiranên kovî ne

Nayên kedî kirin.

Ji misînên elendê, nivîşka temenê te dinoşin.

Te Ji taya têkçûnê şiyar dikin

û li binê perda çavên te radizên.

** * **

Şivano...

Destên xwe têxe paxila hîvê

Misteke ax derîne.

Xunava omîdê li ser birjîne.

Heriyekê di pizdana Adarê de bistire.

bi wê heriyê, nêriyekî ji xewnên xwe bafirîne.

Belkî buhar, çemê payîzê , ji ser paşeroja te vegezin.

Belkî li vî warî, destarê şîn û mirinê raweste

Azadî bizê .

Çav têr ken bibin.

Zik têr nan bibin.

Zarok têr bilîzin.

Şam _ 2001

Çar Gul û Bendewariyek

Qawaneke ji nav pencên zivistanê

û li nav dojeha berfeke har...

di guhê latekî de kire pist pist:

Buhar dereng ma !?

Ew ê kengî bê, û min rizgar bike.?!.

Lat, lerizî

derizî

herifî.

** * **

Sosinek li qeraxa hêviyê kevnar rûnişt

û bi xwe re axift:

Ew ê bê...?

ew ê neyê...!

Bê...?

neyê...!

neyê.

*Surra bayekî westiyayî silav da yê
pelên wê yên weşiyayî belawela kir.*

** * **

Benefeşkê, raza dilê xwe rijande Ferêt.

ji wî pirs kir:

ev sê hezar sal in, ez li benda wî me...?!

çiyak çû...?

çiyak hat...!

Ezmanek çû...?

ezmanek hat...!

Neteweyek çû...?

neteweyek hat...!

Welatek çû û nehat...!?

û ew, hîna nehatiye, ku here.

Ez li benda kê me...?!

Ferat şewitî

miçiqî.

** * **

Nisrîneke koçerî, dûrî xwe ket...

li pey leylanê ket.

Bi agir re govend vegirt.

Dema xwest vegere xwe...

xwe nedît.

Mêbûn

reng

bihn

û navê xwe wenda kirin

Çend Guman

Rozerîn...

*Çendîn bextiyar im, ku di gulistanên çavên te de
bibim dîlek*

û bi qarmeçiyên bijangên te werim lêdan...

werim

lêdan

ta ku giyan bidim yezdan.

** * **

Çendîn bextiyar im ku buhara temenê min

di gel çola te were şikestin û guvaştin.

Û bermayên wê

bi arê evîna te were sotin.

** * **

Çendîn bextiyarim ku mîna artêşeke Mîdî

li ber dergehên keleha evîna te dest...

dil..

û ala sipê hildim.

Û li bin serxweşya têkçûnê bi nav bibim

wenda

bibim.

** * **

Çendîn bextiyarim ku bi tîrên çavên te

li qiraxa çemên hingivîn yên di lêvên te de diherikin

werim kuştin

werim hiştin.

Bi xunava havînê werim şuştin

Û li nava herdû girên laleşa pîroz

ku yezdan bi hemû hinera xwe

bi sînga te ve daleqandiyê

Ez bême binaxkirin.

Rozerîn...

Çendîn û çendîn bextreşim

eger ev hêvî

ev daxwaz

ev xewn pêk neyê.....?

18/7/ 1998

Dirbêsiyê

Serxweşiya Dînbûnê

Buhar nû divejiya.
 dem razayîbû li ser banê helbesteke qedexekirî.
 Di şeveke Beyrûtî de, careke din
 ez pêrgî te hatim.
 Vê carê, newroz berî dema xwe hatibû
 û xwe di himbêza kenê te yê kej de veşartibû.
 Tîp, lal bibûn
 Gotin, westiya bûn.
 vemirî bûn.
 Bi elfebêtkî çavan, me silav da hev.
 Tîşteke ji sînga min firiya
 û li ser destên te lûsiya û got:
 Tu ji çî ditirsî xifşa min ya kovî?!
 Ji ser lêvê te yên tenik
 kenekî kej û fedyok bişkivî û bersiv da:
 ji te li ser te ditirsim .
 Ditirsim ev çîroka li nav stiriyan şîhateye
 ew jî berê xwe bavêje.
 Dîno.....
 Mîna ewrim, bê welatim.
 Şahinga min...
 Evîna min welatê te ye.
 Helbesta min paytexta te ye.
 Bifire... bifire... bifire...
 Lê, sînorê dilê min derbas neke.
 Erê dînim...
 dînim...
 dînim.
 Dîn natirsîn, fedî nakin.
 Bibûre nema karim.
 Ez ê biqûrim...
 Ji te hez dikiiiiiiiiim
 hez dikim.

* * *

Buhar nû divejiya.
 Dem hîna razayî bû li ser banê helbesteke qedexekirî.
 Di rojêke beyrûtî de, ez pêrgî te hatim.
 Di nav bera ezman, derya û çavên te de
 matmayî û wenda bûm...!?!

*Kîjan çavên te ye, kîjan deryaye...?!
kîjan çavên te ye, kîjan ezmane...?!
Ew awazên li ser lêvên pêlên deryayê
bi min re semadikirin, ne sitêrk bûn
dengê te yê şîn bû.
Yên xewin û helbestên min
zindî kirin û kilfî kirin, ne şevên beyrûtê bûn
pêjna te ya kej bû.
Min nuh bawer kir ku ez dînim.
De ji ronahiya dêmê xwe û
li ser pelekê ji kenê xwe
Ji dîn ê xwe re nivîstekê binivîsîne
û di nava vê hêviya sêwî de min bilorîne.*

* * *

*Buhar vejiya û keniya.
Demê li ser banê helbesteke kuştî
li xwe û li zivistanê dixist.
Di şeveke Beyrûtî de em pêrgî hev hatin.
Me hev dît?
Me hev nedît?
Ez têr giriyam.
Tu têr keniya û me hev wenda kir.*

Şam _ 23/3/2002

Ji bo Neviya Ronahiyê (.....)

*Jiyan û cîhaneke din bû.
Pêjna wê ya fedyok
mîna leylandê bû.
Dikeniya û ne dikeniya.
Mîna xunavê dibariya û ne dibariya.
mîna awazeke qereçî ji tîlên gîtar ê bireve
ji min direviya
û di nav zeviyên helbesta min de xwe vedişart.
Giyanê min jê re got:
Cêwiya min, xuşka hîvê, neviya rokê
baş dîzanê ez kovî me*

nikarim xwe kedî bikim û evîna te veşêrim....

nikarim.

Ma çiya bilindbûna xwe ji bîr dike?!

rok ji tîrêjên xwe şer mdike?!

zemîn ezmanê xwe diguhere?!

Ma çem li kaniyên xwe vedigerin?!

Ez jî nikarim. . .

nikarim . . .

nikarim

** * **

Berî sê hezar sal min te li qeraxa Dijle rûniştî dîtî.

Bi nalîna karwanê Stiranên min yê serjêkirî

te xwe dişûşt

û bi bênahiya min, te xwe zuha dikir.

pêlên sirûda Dijle lingên te

yên mîna cama tijî berf û tîn,

talast û maç dikir.

Ba yê tenik û hênik bi serxweşî, wekî semsya zeviyên sinbilan

bi porên te dilîst.

Û ez li bin baranê dişewitîm.

Bi kenê xwe yê hênik

te bîr a Cûdî didrût

û birîna minê kevnare vekirî dihişt.

Ev sê hezar salin

ez li nav kişwera helbestê

ji te re paytextekê ava dikim

û te bi arê bêrî kirinê

temen

liyan

bawerî

û gumanên min cot dikir.

Qîza Xwedê.. bese...!!

Dilovan be bi perestkarê xwe re.

Bese

bese

27/3/2002

Du Sitêrk Û Gîtarek

(.....)

*Ji rokê hez dikim
ji ber ku ezman dike mîna çavên te.
Ez ê ji Xweda bixwazim, bere bihêle bi roj biçirsim ,
yan ez ê şevê bikujim.
Vê zivistana bêbext
Per û baskên çûkên bîranînan şewitandin
û tişteke ji havînê re nehîşt.
Ewê çawa xewa ewran li binê gunehên vê zivistanê bê
da ku bi dizî dakevim zemînê
û bejna stiranên te yên koçerî
bost... bost biramûsim.
Heyv û xuşkên min, biryara min pejirandin:
Yan ew ê şev rengê xwe bike şîn
yan em ê ji wê barbikin.*

* * *

Gîtar

*Ji konên qereçyan, ta dergûşa dûmahiyên, li başûrê Xwedê min dest bi ken û
giriye xwe kir
hîna "Lorka" nizanîbû bê qereçî Kî ne û çî ne.*

*Şevê derî veke..
Li bin siya awazên min
dem û qonax kurt dibin.
Evîndar hev hembêz dikin
Helbestvan dîn û serxweş dibin
Birçî û birîndar radizên.
Li ser pelên nefel û şengebiyan
şevnem şopa dastanên min nîgar dike .*

*Şevê . . . derî veke
Leylan bi xwe dikene
ku çawa bûye rêberê keriyên çivir, pezkovî û xezalan..?!
Leylan bi xwe dikene
û xwîna Siyamend û Xecê
Mem û Zîn di koka sîpan û damarên cizîra botanê de digiriya.
Li bakurê demsala stêrkan
kew derdiketine nêçîra hev.
Keçên avê, biskên xewnên xwe, bi agir dişon.
Keçên axê, li ewrekî boz siwar hatine*

*û awazên min, mîna tov, gijlok û pirsan
li ser şûv û çola şevêrkên bêrîkirinê dibarînin.*

Şevê . . . derî veke...

Mêvanên buharê, ji havînê xeyidîne.

*Havîna par û ya îsal, xêrnexwaz bû
çavnebar bû.*

*Ev sêhezâr sal in, piştî kuştina dîrokê bi şiva şivaneKî kurd
nema baweriya tirî û hejîran bi tîn û germa havînê tê.*

Erêêêêêê.....erê...

Hey jaro menal

evîndaro menal

birîndaro menal....

menal.

Di buhara bê de

ew ê dîsa koçer vegerin zozanê giyanê te

û xwîna te, ji xwe re bikin kon.

Wê çaxê...

tê min hilgirî, û li ser têlên min pesnê çavên wan bidî.

Belkî dilên wan, vê carê, bi te bişewite

û te bi xwe re bibin.

Şevê . . . derî veke

Xweda ya dil û nêrgizan dixwaze

derbasî helbesta şervaneKî Mîdî bibe.

Piştî xwe daye Cûdî

û berê xwe daye bihna têkçûna Pênûs û gotinan.

Daristan û çem û lawir û firindeyan

li ser temenê wî, dîlok û hêsir dibarandin.

Şevê . . . derî veke

Ez nexweşim.

Nema karim têrî bîranînan bîponijim.

Têrî dilan, binalim.

Têrî çavan, bikenim û bigirîm.

Têrî xewn û helbestan, bifirim.

Têrî şadiyê, govend û dîlanan bigerînim.

Şevê . . . bibûre

Min sare...

Derî bigre.

(.....)

Ne mîna te...na.

Belkî mîna buharê

yan mîna bêdengiyê

hingê ji rengê şîn hez dikim

bi roj dimrim

û bi şev divejim.

Ne mîna te...

Belkî mîna xewnan

dilê min dibije koçeriyê

û rêwîtiyeke di gel baranê.

Tenê berbang dikare şopa min bibîne û bixwîne.

Tenê vedenga zingîna zingilan

dizane bizarê vegera min bike.

Na...ne mîna te...

Belkî mîna tenahiyê

yan mîna şevê

yan mîna têkçûnê

Welat dizane, çawa xewnên min

di nav bera min û xwe de par bike.

Ne mîna min...

Belkî mîna birînê

tu weke sitêrkek sêwî

di nav raman, dil û bîranînên min de xwe diçînî.

Lê, weke ez te dibînim

tu min nabînî.

Tu dibînî...???

Evîndarê Qîza Çiyayê Cûdî

Di şevbuhêrkên zivistanê yê har de...

Dapîra min wisa digot:

Çemê gundê me xwînê bû.

Dema serxweş diket...

Çar zarok bi qurbana xwe dikirin

Û du daristan ji qîzanê dixistin.

Mîna agir dilbijok bû.

Carekê, li kolanên biyanîyê, wî kuştî dîtin.

Û careke din, li gundekî himberî gundê me, peya hat dîtin.

Cara dawî

Di nav wêneyên helbesteke kurmancî de, girêdayî hatibû dîtî.

Kûûûr dinaliya.

Kesî nizanîbû bê ji çi? Û ji bo çi?

Yan li ser kê dinaliya.

** * **

çemê gundê me xwînê bû

xezal, pezkûvî, li qeraxên wî nedîçêriyan !?

Quling, werdek, kew û kevok, li ser wî nedifiriyan.

Ji ber ku wî, tim û tim ewr dixapandin, ew bi xwe re dibirin dîlana sinbilan û venedigerandin.

Dilê axê bi pêlên wî dişewitî.

Çavên xweristê li razana wî bûn,

Û çavên wî li razana çiyayê Cûdî bûn.

** * **

çemê gundê me xwînê bû.

Ne hogirê bahozan bû,

tenê bûkên baranê ji xwe re direvandin.

Lê, wî ji qîza çiyayê Cûdî hezdikir.

bi evîna wê, welatekî ji dînbûnê,

ji tîbûna kendavên wê

û qeqeba memikên wê re ava dikir.

** * **

çemê gundê me xwînê bû

Dema dixwest bistirê,

Şevê ji ramûsan

li ser ponijandina sitêrkan dirijand.

şeveke ji tolaziyê

berdida meyxana gotinan.

şeveke ji poşmanê û lavijan

bi pêlên xwe cot dikirin

û bi xemên xwe diçandin.

Bi her kesî re û ji her kesi re dikeniya.

Tenê, bi xwe re digiriya

Tu caran, bêriya gundê me nedikir.

Lê, gundê me, bi qasî çar gerdûnan
bêriya wî fikir.

Bi hezarên caran....

li ber dergehên Cûdî radiwestiya.

Helbestên xwe yên qereçî,

Ji xecxecokên wî re dixwendin.

Bi hezarê caran....

di xewnên xwe de,

qîza çiyayê Cûdî, kuştî didît.

Lewra, her ku serxweş diket

Çar zarok bi qurbana wê dikirin,

Û du daristan ji qîzanî dixistin.

* * *

çemê gundê me xwînê bû.

Digotin:

bavê wî ejdeha bû?!
Û diya wî, dêw bû?!
Digotin: ku buhar, xuşka wî ya ne ji dê bû.
Û payiz, xuşka wî ya ne ji bav bû.
Wisa digotin...??!
Digotin: bejna wî ji jiyane bilindtir û dirêjtir bû.
Lê, niha...??!!

* * *

çemê gundê me xwînê bû.

Gelek çav

dev...

nav

destpêk û dawiyên wî hebûn.

Lê, tenê dilekî wî hebû.

Her sal, berî cejna newrozê,

Dixwaze dîsa vegere gundê me.

Lê, newêre.

Hîna nizane bê wê ji kê lêborîna xwe bixwaze?

Ji kavilan? yan ji dûmanê?

Ji kundan? Yan ji toz û pîrevokan?

Min pirs kir:

Dapîrê... ma çem li gundê me hebû?!
: .. Na, ji ber ku xwînê bû..
..... Xwînê...!!

Dîsa Kenê Çavên Te

Dema çavên te dikenin...
Gotin, wate yê xwe sergûnê buhara te ya dîlkirî dikin.
Xamav dibe mey.
Helbest serxweş dibin.
Li dora bejna te dizîvirin.
Ji gunehên xwe, xwe dişon.
û li ser siya te ya kej, limêj dikin.
Li ber lingên te, ji te niyaz û Lava dikin, lêborîn û dilovaniyê dixwazin.
ji nava kaviên têkçûnê,
mîna kaniyên ronahiyê radiperin.
Hildikşin pêjna te ya ji benefş û laleyan hatiye hûnandin.
Cota kewên li ser zozanê çûn û nehatinê razayîne, şiyar dikin.
Min, li min vedgerînin.
Dikujin
dihejînin
divejînin.
Bi xewneke qedexe, min dipêçin
li ser tîrêjeke sêwî, siwar dikin
û ber bi te ve dişînin.

* * *

Dema çavên te dikenin...
Dîrok xwe dikuje.
Dem, di kêlîkekê de
temenê xwe tîr dike.
Hemû efsane û rastî
hemû pirs û bersiv
hemû despêk û dawî
hemû çiya
daristan
çem
rê
gund
demsal.....
ber bi te ve tîn.

*Serkêşê vî karwanî, dilê mine.
Karwanê xwazgînên te, ji min re ye.*

* * *

*Dema çavên te dikenin...
Hîv xwe vedişêre
û şev şermiya xwe diçirîne.
Ez dilerzim
Diderizim.
Dibim keldûmana helbesteke bê xwedî.
Hemû çûkên ji helbesta min, koça dawî kiribûn
vedgerin demsala evîna min û te.
Aso gêj dibe.
Xwe ber dide şikefta şeveke westiyayî
û ez hîna dilerizim
diderizim.
Dem ji bendên xwe azad dibe.
Newroz dibe newroz.
Nû, dibim stiranbêjekî koçerî
û destana evîna xwe û te
ji çemê Dijlê re dibêjim.
Dibim şivanekî koçer ku li kerî û bilûra xwe digere.
Bêrîvana xewnan...
te dibînim, û xwe wenda dikim.*

* * *

*Dema çavên te dikenin...
Jiyan dikene, û mirin digrî.
Mirî divejin
û giyan dibarin.
Xwerist dikeve govenda min û te.
Her tiştên qedexe, rewa dibin.
Xewn dibin rastî
rastî dibin xewn.
Birînen min xunava kenê çavên te dinoşin.
Xwefiroşa leylanê...
ta kengî tê welatekî ji rewrewkê nîgar bikî..?!
Ezim welatê te.
Ji paş dûmana têkçûnan*

*destên xwe dirêj dikim
himbêza xwe, ji te re vedikim
De were...
Ma tu newestiyayî...?!
De were...
çav
dil
giyanê min ji te re dikenin.*

** * **

*Dema çavên te dikenin...
Dibim sûlav, ji her devera te kenê xwe
lê belav kiriye
ez kenê te berhev dikim.
Her cihê Pêjna te, tê de derbasbûye, radimûsim.
Dengê te yê belav bûyî
ji bayê û ji hemû guhan, berhev dikim.
Wêneyên te, ji bîr û bîranînên
xelkê dertînim, dicivînim
û ji xwe re vedişêrim*

** * **

*Dema çavên te dikenin...
Dibim zembîlfroşê te, Xatûna koçeran.
Mîna artêşekî Mîdî, ku cenga xwe wenda kiriye
mîna refekî hêviyên çilmisî, ku li dilopeke ronahî û mistek
axa baweriyê digere
Ez xwe davêjim bextê ol, êl û karwanê te
yan te bidin min
yan min bidin te*

11/4/2002

Mikurhatinên Dereng

*Na, ne wisa bû !?
wisa bû...
Koçeran, ewrên buharê ji xwe re kiribûn kon .
Keriyên xwe berdabûn zozanên keldûmana xwînê.
Koçeran dilflandin...*

*Halan didan Cûdî
da ku çemê Dijlê aş bike
Û berê wî bide Dirbêsiyê
li wir daweta min û te, li dar ketibû.
Lê, ez û tu, ji dil û hestên xwe ditirsiyan û direviyan.*

* * *

*Na ... na... ne wisabû
wisa bû..
Agir, dem li pey xwe kilît kiri bû.
Nîsanê, li ser dêmê elendê
soza kuştina xwe nivîsandibû.
Koçeran, konên xwe firotibûn bayê
û ne ji Cûdî re difîlandin
lê, ji dûmahiyeye nepenê re.
Dijle, xeyidê bû..
Razayê diherikî.
Razayê dikeniya û digiriya.
Û ez û tu
di xewneke har de,
em xuşk û birayên hev bûn.*

* * *

*Ne wisa bû?
wisa bû...
Havînê nedihîşt em vegerin zarotiya xwe.
Aso ji xwe re
li findekê û du çavên şîn digriya.
Xweristê banê me fikir:
Werin...
Ka werin.. ez ê çîroka vê xwîna fedyok
ya ku ev sêhezare buhare
li ser vê xakê dirije, ji we re bêjim.
Werin binerin, bê şevên havînê
çiqas dilên ter û teze bi xwe re birin dogehê !?
Lê, em neçûn
neçûn...
neçûn.*

* * *

Ne wisa bû !?

wisa bû....

Evîneke qereçî û gumanên birçî

ramanên te şewitandibûn.

û dilê te hiştibûn ji stêrkan re.

Û ez, ne sitêrk bûm!?

* * *

Na...ne wisa bû...!?

Ez û helbestên xwe sêwî bûbûn

winda bûbûn.

Û tu bû sitêrka vegera me yî bi hev re li konên koçeran .

* * *

Bera weke te be...

wisa bû....

wisa bû.

Lê, ji bilî te jî, hîna hinek dînen din hebûn

ku dilên wan, dibijiya xewê

li bin konên koçeran.

Û ji bilî min jî, keskî din tune bû ku helbestên te ji wa re bifirre.

Ma.. ne wisa bû??

Wisa bû.

Şam _ 2 / 2 / 2003

Nameyek Lezgîn Ji Do re

Piştî silavan.....

Tu çawa yî?

Ma tu hîna wekî xwe yî?!

Sibe na dusibe...

mîna cejneke ji gewriya xwe birîndar be

ji xewê bîstikên şîn pars dike

ez li virim.

Her êvar, serê xwe datînim ser çoka rewrewkê.

Biqasî çar goristanan, razayî diramim.

*Biqasî çar payizan, xewnên min, min dimêjin.
Bişkokên şevê, yeko....yeko
ji têkçûnên xwe û te re vedikim.
Berî gencîneyên te, sitêrkan, morî û zîvên wan talan bikin
li ser pêjna min ya li qeraxa wateyan westiyayî û matmayî birijînin.
Berî ku Adar tola xwe ji Eylûlê bistîne.
Hîna xwîna helbestê germe
ew xwîna ku berî limêja şevqê ji sawîrên Xwedayên basik şikestî hatiye sitandin .
Sawîrên Xwedê û yên Kurd û kew û kundan yek in.
Lê, sawîrên kewan bi yê kurdan ve kilîtkirî ne.
Lewra, axê sozdaye ku sibe na dusibe, tola agir ji avê bistîne.*

** * **

*Sibe na dusibe...
Mehrecana mirina havîne ye.
Hejîr û tirî sêwî bûne.
Kuştîyên peyvên fedyok
mîna berfê, li ser tayê dumana dilbijokiyê, rêwîtiya xwe berdewam dikin.
Li bin siya awazên genim û pembo, gunehên hev dijmêrin.
Di nav bera çar mirinan de, sitiraneke bi stiryên şîn, bo te dibêjin.
Stiranên bi strî... Welatên bê peyv û heyvin
awazên bê dengin
xemên meyandî ne
û pencereyên ji xewnên firindeya re vekirî ne.
Di stiranên bi stirî de...
Bihn bi zimanê rengan taxivin
û reng bi zimanê giyanê şervanekî Kurd, digirî û dikenin.
Li ser sosreta çemê ku di himbêza bakurê xeman de razayî
taxivin û digirî .
Bakurek heye...
Di nav bera têkçûnan de rûxiyaye.
Bakurek heye, di nav bera çar başûran de derizîye.
Bakurek heye, kêla goristana xwe ye
ala serhildana xwe ye
hogirê xwîna xwe ye
tolhildêrê peyva xwe ye.
Başûrek heye...
Dengê xwe ji pêjna xwe nasnake.
Başûrek heye, xwekujê xwe û agir e.
Başûrekî din heye...*

Bakurê xwînê ye
Pîrozgehê dîna ye
birayê sê xwişka ye
xuşka sê bira ye
dotmama sê hezar kewa ye
Pismamê sê hezar şoreşa ye.
Ne li wî başûrî
li başûrekî din, li hêviya te me
sibe na dusibe.

* * *

Sibe na dusibe...
Salvegera sê hezaremîn ya kuştina min e.
Û hîna dem û cih, li kêla min digerin.
Ez jî...
Li ser pişta "demilqeran"
li pezkoviyê ku ez kuştîme digerim
da ku lêbûrîna xwe jê bixwazim.
Berî ku Sîpan tewana xwe, bi qêrîna Xecê bipêçe
û bi şûrê zivistanê
bîranînên xwe û yê payizê bikuje.
Rûwê min, mîna qulingekî sêwî
li nav kolanên tenahî û mişextiyê wenda bûye.
Gewriya min...
Bûye dergûş û hêlana peyvên nepenî.
Peyvên nepenî...
Lavijên poşmaniya Xwedawenda ne.
Peyvên nepenî û bihna kenê te, cêwî ne.
Cûdiyê ku di newqa Dijlê de
çar hezar birîn bişkivandiyê
soza kuştina Dirbêsiyê daye Dêrikê
sibe na dusibe.

* * *

Sibe na dusibe
Ezmanê heşta sayî ye.
Giyânên sor...
Bêy ku soza vegerê bidin, bê xemên zemînê jixwe kin
çûne nêçîra ponijandinên hîv û çûkên Cotmehê, li ezmanê pêncan .
Giyânên şîn...
Razayî, lavijan dixwînin

û gunehên hev dijmêrin.
Dixwazin tolaziyên xwe, bi ezmanekî ji girî pîne bikin.
Giyanên kesk...
Tinaz û qerfên xwe, bi pîrozmendan dikin.
Xweziya xwe, bi gunehkaran tînin.
Ji giyanên sor şerm dikin
û dijberiya xwe bi giyanên zer re berdewam dikin.
Giyanên sipî...
Tenê ji havîne ditirsin
û ji adarê fedî dikin.
Giyanên zer...
Ji du tiştan hez nakin
Ji rengê xwe û ji tenahiyê.
Nifiran li wê roja ku Xwedê
wan tê de zer kiriye dikin .
Sûnda kuştina Xwedê xwarine.
Lwera, her payîz, li ezmanê duduyan, kozik û çeperên xwe vedidin.
Giyayên zer, çavnebar in.
Dijatiya giyayên keş û yê şî dikin.
Giyanên keş...
Hîna koçer in.
Li nav ezmanan, ji stiranên xwe re, li welatekî biqasî çar bihostan, ji kenê
qurnefilan, digerin.
Hîv û rok, nikarin pesnê ronahiya xwe bidin
dema ew difirin.
Carna, dibin ewr û carna, zingil.
Carna, dibin cejna bineş û perperîkan.
Û carna dibin her tişt, ji bilî xwe.
Giyanên keş...
Serwerên giyanên reng û danganin .
Di ser pireke ji hêviyên miriyên çav vekirî re ,
miriyên çirûsk û pertewan, derbasî buhuştta xwe dikin.
Miriyan bê gor
di gel Tebax û Tîrmeh ê seyranê dikin
û di gel mijdar ê, li ezmanê yekem, Sibata par dilorînin.
Giyanên reş...
Evîndarên ronahiyê ne.
Helbestên xwîne yê bê tîp in.
Sawîrên zeytûnan, mîna alê hildidin.
Zagon û yasayên şevê, bînpê dikin.
Gunanên Xwedê, bi tenahiya wî har dikin.

Û kişwera şahê cinnan, li ezman ê heftan , ava dikin.
Ne tenê xewnên sipîndarên kezîkur û şengebiyên perîşan û bextereş , şirove
dikin.
Lê, yê welatê mirinê jî, ew ê sibe na dusibe, şirove bikin.

* * *

Sibe na dusibe...
Şîna tîpên serhildêr
li ser koçkirina welêt ji helbestên xwînê, bi dawî nayê.
Helbestên xwînê û helbestên agir
keçên xemgîniya axa Mezobotamya ne.
Helbestên xwînê...
Ji saw û sawîrên kew û pezkoviyên hatine hûnan .
Helbestên xwînê...
Demsalên bin avbûyî, li bin pêlên dînbûn û zaroktiyê ne.
Helbestên xwînê...
Mikurhatinên xwê ne, li pêşiya pêjna min û te ne.
Li ezmanê heştan, sibe na dusibe, tê dubare bike.

* * *

Sibe na dusibe...
Bawreiya min bi min û te û sibe
nema tê.
Hema îro were..
ne sibe na dusibe.

10/6/2003 - şam

Siwarê Tîpên Bêcir
(Ji bo helbestvan Kemal Necim)

Hogirê toz û mijê...
Tu bi xwe re, çima li hev nayê!!?
Kes weke te nîn e.
Û tu ne weke xwe yî jî.
Mîna XwedayeKî wendayî
di nav bera dil
tenahî

bêdengî û xemên xwe de.

De bajo....

Hino ..hino bajo

Giyanê te yê şikestî, ne tiyê firrînê ye.

Lê, dixwaze li bin siya zeytûnekê razê.

De bajo...

Berî razên helbestên şîn

Qîzaniya xwe bifroşin qirala cinnan, bi misteke xew.

De bajo...

Berî çavên kezîzerê

ji liyan û xewnên te birevin.

Çavên kezîzerê û barana kesk, cêwiyên rewanê te bûn.

Heft hezar çîrokên şevên zivistanê

di bîstikeke fedyok de dimeyandin.

Û heft hezar şevên har û kovî

di çîrokekê de diwestandin û dilorandin.

Lê, berî oxira dawî, te ji nêzîk ve li wan çavan nenerî!?

Te li çi dinerî?!

Li xweliya tirsê

ba yê têkçûnê

li hemû destpêkên bê dawî

hemû dawiyên bê destpêk, dinerî ?!!!

Siwarê birînan...

Hemû raperîn, artêş û keştiyên te

li ber dergehên Efrîn ê xwe şewitandin.

Ji ber ku tu ne mîna helbestên xwe jî bûyî.

Birastî nizanîm....

Bê çawa ew tîpên bêcir

û gotinên serhildêr xwe dihûnin

û rişma xwe didin newêrekekî weke te?!

Raste tu dikarî şevê bi tîrêjekê girêdî

û bi dilopek xem bişweitî.

Tu dikarî li ser vedenga tavên Beyrûtê demsala ramûsan nîgar bikî

li ser pêlên deriya wê

mîna pêxemberan bimeşî.

Tu dikarî buharê di paxila payizê de bilorî.

Lê, nizanîm bê ta kengî

ji têkçûn û tirsê re bijî ?!

Tu dizanî çawa ji perestgehên xemên xwe ken biweşî.

Lê, tu nizanî mîna helbestên xwe bigirî?!

Siwaro... de bajo..

Bajo ber bi cîhaneke ji girî ve.
Giyane xwe ji tirsê dawesîne.
Kî dizane bê kezîzer û kezîreş
di Kîjan dogehê de li benda te ne?
Rapere li himberî xwe.
Berî tîpên bêcir
rişma hespên xwe yê şemûs ji te bistînin.
Carekê tenê, bibe weke xwe û bajo...
 bajo...
 bajo...
Berî deriyên poşmaniyê werin girtin.
Dadgeha dilan, li gunehên te yê ku gerdûn nikare wan hilgire
ew ê bibûre.
Hey raza bê xew, û xewa bê raz.
Karwanê telsemên xwe bajo
ber bi wan ve.
Hey wendabûna kilîtkirî bi wendabûnê...
Çavên wan kilîta razên te ne.
Çiyan, li bahozan napirsîn û natirsîn.
Mij, nabe hêlîna çûkên baweriya te ya bi te leriziyayî.
Dema Zembîlfiroşan bê veşer çû.
Û pencera kezîzerê hîna vekiriye.
Ji xwe nereve.
Li xwe vegere.
Yan bersiva min bide...
Ta kengî ew ê newêrek karibin helbestên wêrek bihûnin..?!
De bêje....
 bêje?

Zingilê Evîn û Birînê

(Ji bo şehîdê hozanan û hozanê şehîdan pakrewan SERHED).

Dema tiliyên te ramûsan didan têlên tenbûrê
hemû demsal diherikîn.
Pêlên ji ken
Pêlên ji girî
û pêlên ji keserên kûr
û mijûlbûn û ponijandinên sor diherikîn.
Şev, dibû hêlana xewnên qedexe.
Şev şil dibû zuha dibû.

Dîn dibû ...mest dibû
wenda dibû...diyar dibû
diyar dibû... wenda dibû.
Li bin siya awazên te yên hênik
evîn
welat
azadî
û hêvî dibişkivîn.
Di wê demê de min nas kir
ku yezdan, hemû zingilên xwe
di gewriya te de veşartibû.
Min nas kir
ku surra ba yê serê sibê
tenikbûn û nazikbûna xwe
di zelalbûna dengê te de guvaştibû
meyan dibû.
Di wê demê de min nas kir
ku tenbûra te tifinga te bû
û tifinga te tenbûra te bû.

* * *

Kesî nizanîbû bê te soz dabû kê?!
Dotmama te ya Mîdî...
Ji şaneşîna zivistanê
li Sîpanê Xelatê dinerî
û bendewara te bû
ku tu mîna hîveke ji stiranan
ji serê Sîpan bigindirî gola dilê wê.
Yan mîna dastanekê tu werî
û dawiyekê bê girî hambêz bikî.
Yan mîna çemekî ji perperîk û sitêran
biherikî û buhara wê av bidî.
Lê, tu nehatî??!
Newroz li ber dergehên Adarê westiyabû
Li benda te bû
da ku tu zivistanê kilît bikî
û sirûda payîzê vemrînî.
Lê, tu nehatî??!!
Gola Wanê
Keleha Farqînê

Meydana çarçira

Amûda bavê Mihemed û Dirbêsiyê , birîn û bîranînên te dicivînin.

Bi xunava giyanê li ser dêmê elindê ,

herdû çavên yara te şêwe dikin.

û ahengeke ji keskesoran

ji bo hatina te dihûnin.

Lê, tû nehatî??!!

Hewlêr bi awazên te, xwe xemilan dibû.

Keriyên xezalan...

Refên çûk û bilbilan...

Kerwanê soz û doz ê

Zap û ava şîn

û hîva şevêrkên havînê

tev bi hev re govend û dîlan û sema girtibûn

û li benda te bûn

Lê, tu nehatî ...

nehatî...

nehatî...??!!

Kesî nizanîbû ku Beko di heman demê de li nav kolanên Hewlêr û Cizîra Botan digeriya

û Kîna xwe bi diranên gurên boz tûj dikir.

Kesî nizanîbû bê feleka pûşt, li ser rêya hatina te

konê bêbextiyê vegirtibû

û zewiyê ji xefkên bi jehr çandibû.

Hewlêr, xwe avêt himbêza Cûdî û qûriya

giriya. Kevanên keskesorê şikestin.

Şevê, bi şûrê ziviztanê xwe kuşt.

Helbestan, xwih didan.

Nema zanîbûn bê çawa ew ê

xwe bi dawî bikin.

Awazên te, îro sêwî bûn

Sitiranên te bûne ewrên kesk

li ser dojeha ku barkirina te, di dilê me de vexistî

deryayê ji aramî barand.

Lê, dojeha venemirî ?!!

* * *

Ez li ser bihna her gulekê, te dixwînim.

Di nav pêlên fîxana her bilbilekî de ,

li nav xemgîniya her dildarekî ,

kenên her zarokekî ,
lorîk û dîloka her dayikekê de
ez te dibînin.
Her ku newroz li dergehên Adarê dixê , di stiranên te de
ez maçî yar

welat
azadî
û Xwedê dikim.

Nikarim... nikarim.. nikarim.
Nikarim bêjim Oxir be.
Yan li me vegere?
Yan min bibe gel xwe.

Tirs

Şeveke dîn...
Dadikive pişika pênûsa min.
Min bi xîzxîza kuxikê şiyar dike.
Çavên sirûda xwîna min kil dike.
Û li bin sîya birîneke kevnar radizê.
Hîva şermok...
Zîva xwe dilop
dilop berdide peyala min ya tijî xew .
Li qorziya bîranîneke dûr...
Pêjneke tazî li hestiyên evîneke binaxkirî rûniştiye.
Dikene...!!
Min bi aliyê xwe ve dikşîne...!!
Lê, ez ditirsim ji do?!
Tînim bîra xwe ...? tînim bîra xwe...?
Ev çavên ku di ezmanê xwe de
çendîn ezman guvaştin
ne biyanîne?!
Ev lêvên di hingivê xwe de
stirana tirî meyandine
ne biyanîne?!
Ev sêvên tijî çîrok ku çawa tilyên min vedixwînin
çêrandinê li nav mewîjên xwe
ne biyanîne?!
Ev porên zêrîn, ku mîna aso yên ji sinbilan diçirisin
ne biyanîne?!
Tînim bîra xwe??
Tînim bîra xwe??

Lê, ez ditirsim...!!?
Ditirsim...!?
Ditirsim ji do.

Şam .. 20/12/2000

Dastan

Hebû tunebû... hebû ez û tu.
Min ji te hez kir.
Te ji min hez kir.
Welat ji me hez kir.
Lêêêê...
Beko hebû...Beko.

Kilîf

Sitêrvanekî, birîneke min xwend, û got:
Despêka te, bêdawî ye.
Helbesta te, hişk û tî ye.
Xewna te lal û sêwî ye.
Arê dilê te vemirî ye.
Kilîfta birîna te...
di demsala pêncan de
ji salek efsaneyî wenda bûye.

Gotina Kuştiyekî

şev bênişî...
porên te, za.
Hîv keniya...
dêmê te, za.
Elendê xwe meyand
lêvên te, za.
Ezman xwe guvaşt
çavên te, zan.
Hevirmêş û berfê, hev hembêz kirin .. ramûsan dan hev
bejna te, hûnandin.
De bêje...

bêje...
bêje...
çawa ezê ne kuştîyê te bim, lêêê...!?
çawa ezê karibim evîna te veşêrim
... çawa...!?

18/3/2002

Bang

Pênûseke zarok qîriya:

Gelî tîp

gotin

helbest û xwendevanan

Gelî çûk

demsal û daristanan

Di vê avdarê de

dilê çemekî penaber hatiye dizîn.

yê ku dîtiye

yan biriye

yan diziye

pîroz be li wî û sipas jê re.

Tenê, bera ji helbesta (serxweşiya dînbûnê) re bêje.

Şamê got: li gel min e.

Bêrûtê got: ew li gel min e

Dêrikê got: li gel min e

Dirbêsiyê got: li gel min e

Pêxembera viyanê û neviya ronahiyê kenîya û got:

Na... na, ew li gel min e.

Bîstîkek Li Bin Baranê

Li devera ku wateyan lê dest bi sitirana xwe dikir

Te kuştina min, bi dawî kir.

Cihê ku wateyan lê rêwîtiya xwe bi dawî anîn

Min dest bi giriyê xwe kir.

Nema zanim kîjan adar bû?

Kîjan adarê, hatim kuştin..!?

* * *

Hissssss...

Ji baranê re nebêje:

Piştî sê hezar adaran

ezê werim cejna memikên te pîroz bikim.

Ji ber ku baran dizane.

Lê, ewr hîna nizanin.

Peyvek Şîn

Di gel çûkan radîza.

Di gel xewnan şiyar dibû.

Di gel bêdengiyê, şev vedixwar.

Bi qasî biharekê dikeniya

û bi qasî ezmanekê digiriya.

Carna dibû govendek di gel agir.

û carna xewsivik û newêrek bû.

Di gel mirinê rêwîti dikir.

Di gel min, her êvar, dihat kuştin

û di gel helbestê divejiya.

Şam 7/2/2003

Du Tablo

Bi hev re û di demekê de

helbesta min, li ser bêdengiya şevê

vedenga kenê te yê kej dikola.

û evîna te ya efsaneyî, bi dizî,

bi agirekî kesk, di dilê min de, ji bo xwe buhuşte

û ji bo min dojehek har dikola.

1 / 4 / 2002

Mistek Pirs

Ji çiyê pirsîn:

Tu çawa bûyî çiya ?!

Çiya got: Min ji ezmên hez kir.

Ji çem pirsîn: Tu çawa bûyî çem ?!

*Çem got: Min ji deryayê hez kir.
Ji sitêrkê Pirsîn:
Tu çawa bûyî sitêrk ?!
Sitêrkê got:
Min ji Şevê hez kir.
Ji min pirsîn:
Tu çawa bûyî helbestvan ?!
Min got: ji ber ku min ji te hez kir.
4 / 4 / 2002*

Pirseke sitewr

*Welatek li xwe digeriya
Pakrewanek dît.
Jê pirs kir:
Ez li kur bûm?!
navê min çi bû?!
Pakrewan got:
Dema min xwîna xwe li ser
xaka te rijand, min got:*

bijê Kurdistan.

Vexwendineke Din

*Tê werî...?
Dîsa weke her car
em herin, xwe di qorziya şevê de veşêrin.
Findekê bi evîna xwe vêxin.
Şeveke din, bavêjin ser xwe.
Sitêrkan li ser dêmên hev biçînin.
Guliyên te vekim ji xewneke qereçê re ku
Xewê pars dike, û difroşe demê. Destên te yên tî û serxweş
di nav govenda razên min de
li kaniya jiyane digere.*

Lêgerîn

*Çiyak, ji quntara xwe re
li dumahiyekê digeriya...
çemek dît.
Çemek, li dawiya xwe digeriya...
deryak dît.*

*Deryak, li despêk û peravên xwe digeriya...
asoyek dît.*

*Asoyek, li despêk û dawiya xwe digerya
çavên te dît.*

(.....)

Çîhan li bin pencê demek zingarî razayî bû.

Li pêşiya çavên felekê

dizê şadiyê, di bewqa rastiyê de

bahozek jehr çand

û gelewêja min ji ser sînga berbangê dizît.

Şama (şerîf) dikeniya û digiriya.

Li çepkan dixist

û li xwe dixist.

Sîrgûn Ê Evîneke Din

Kolanên Şamê gavên min dicûtin.

Bayê wê, temenê min dimêt.

Di nav bahoza hilweşandinê de

çirûskên şîn xwe li cama pencereya tenahiya min dida.

Xewnên zaroktiyê şiyar dikirin

û ez mîna firindeyekê vêxstim.

Ji wê kêlîkê ve, min xwe dît

bê çawa ji paş dumahiyan ez têm.

Xaçê min li ser milê min e.

Li nav kuştar û zeviyên qedexeyan dimeşim.

Min dilê xwe berê xwe ji te re şandiye.

Li hêviya min be

va ez têm

ez têm

têm

têm .

Diwazdeh Şîretên Xwînê

— 1 —

Li paş xwe nenere..!

razek tê kuştin.

Demsaleke fedyok û çemekî dilbijok, têne dardekirin.

_ 2 _

Ranezê...

Berî ku tu pencereya dilê xwe

ji bayê re vekî

û giyanê xwe bi axê kilît bikî.

_ 3 _

Eger di rêwîtiyê de barên te peyv bin?

Bera sor û şîn bin.

Û li wateyan nepirse.

_ 4 _

Tu êzing î...

Hayê ji agir neyne.

Nebêje : ew ê av bi kêrê min bê...!?

_ 5 _

Di beşdariya helbestê de

bi gotinan nelîze

û dengê sawîrên xwe yên toalaz nebhîze.

Da helbest, qîzaniya xwe wenda neke.

_ 6 _

Dilê xwe nebijîne mirinê...

Ta taseke dew

misteke mewîj

nanekî tenûrê

û du çavên şîn li ser çiya hebin.

_ 7 _

Tenê ji xweristê

tu dikarî hînî azadiyê bibî.

_ 8 _

Li her dû cîhanan

her ku zivistan pêrgî payîza temenê te bû

şîreta çar a, sê hezar car bixwîne

û carekê tenê pêk bîne.

_ 9 _

Ji genim û xwê hez bike

Lê, ne ta qûnaxa

*ku desmêja sinbilan bişkînî
û deryayê bixeyidînî...?!*

_ 10 _

Her ku xemgîn bû

mişextî

tenahî

*hêlînên xwe di giyanê te de vedan
rahêje pênuş û bilûrê.*

_ 11 _

Ji ber ku tu jî

ji zarokên vî ezmanî yî

ji şûkên vî agrî yî

ji sitêrkên vî avê yî

min ev şîret ji te re gotin.

_ 12 _

Guh nede şîretên ba yê

û ne yên min jî.

Tenê şîretên ronahiyê pêk bîne.

Şam _ 2003

Naverok

Şivanê Xewnan

Çar Gul û Bendewariyek

Çend Guman

Serxweşiya Dînbûnê

Ji bo Neviya Ronahiyê (....)

Du Sitêrk û Gîtarek

Evîndarê Qîza Çiyayê Cûdî

Dîsa Kenê Çavên Te

Mikurhatinên Dereng

Nameyek Lezgîn Ji Do re

Siwarê Tîpên Bêcir

Zingilê Evîn û Birînê

Tirs
Dastan
Kilît
Gotina Kuştiyekî
Bang
Bîstikek Li Bin Baranê
Peyvek Şîn
Du Tablo
Mistek Pirs
Pirseke sitewr
Vexwendineke Din
Lêgerîn
(.....)
Sirgûn Ê Evîneke Din
Diwazdeh Şîretên Xwînê

Pertûkên helbestvan yê çap bûyî evin..

1- pêxembera evînê , perkeştaya birînê ye. / helbest - erebiye şam .. 2001

2- Rewanbêjiya Şîno . / helbest - erebiye / şam .. 2004